

հաճի ընդ այս , և մատուցեալ բազմակնիք հանրագիր ինչ 'ի դիմաց ազգի իւրեանց՝ ասեն , խնդիր արկանէ ազգն առաջի մեծութեան ձերոյ՝ ընթեռնուլ և իմանալ զայս գիր : Դատաւորք ասեն՝ զի՞նչ է այն , Յոյնք ասեն՝ հանրագիր յազգէն առ Տէրութիւն ձեր : Դատաւորք՝ զի՞նչ կամիք ասել՝ ասացէք , զի ոչ ընթեռնանի այդ գիր : Յոյնք ասեն՝ ոչ կարեմք խօսիլ՝ այլ ընթերցցի և ծանիցի : Դատաւորք ասեն՝ ո՞չապաքէն դուք գրեալ էք զդա , որպէս գրեցիք՝ նոյնպէս բանիւ ասացէք զի իմացուք : Յոյնք՝ չէ արժան մեզ խօսիլ : Դատաւորք՝ եթէ ոչ կարէք խօսիլ զգրեալսն՝ 'ի միջի դորա , ընդէ՞ր բերիք : Քեահեայ Պէյն ասէ՝ եթէ կորուսեալ էր ձեր զդա՝ 'ի ճանապարհի , զի՞նչ ունէիք ասել , այժմ ասացէք՝ զոր ինչ եղեալ էք 'ի մտի , եւ այլ սոցին նման բանք բազում : Գենպետն ասէ բարկութեամբ , ընդէ՞ր տայք խօսիլ դոցա , զի ամենայն ինչ ըստ հրամանի Արքային պարտ է կատարիլ : Ոմանք յԱտենակալաց յորդորէին զՅոյնս 'ի հնազանդութիւն , և ոմանք բարկութեամբ սաստէին և յանդիմանէին , խնայեցէք 'ի ձեզ ասէին՝ զի յօժարութեամբ ձերով պատժոյ ցանկայք : Եւ յետ այսքան վիճարանութեան՝ թեւարկողն Յոււնայ Իզդէթ Պէյ՝ խորհելով ընդ Գենպետին եւ ընդ Տեղապահին՝ ասէ , արժան է ձեզ զայս խնդիր առանձին անօրինեւ և զԱտենանն արձակել , զի փոքու իմն գուցէ մարդ փաստեսցի 'ի Յունաց : Հաճոյ թուեցաւ այս բան Տեղապահին՝ զի քատագով էր Յունաց , եւ ասէ՝ 'ի վաղիւ անդր Յոյնք զգիրս Օմարայ և Սէլիմայ , նոյնպէս և Հայք զհրովարտակն Սէլիմայ բերցեն առ Բէիզ Իֆէնտին , և մեր բազդատեալ զնոսա ընդ միմեանս՝ գտցուք զմիջին ճանապարհն , և կատարեսցուք զհրաման Արքայի : Բակեցաւ Ատենան , Հայք և Յոյնք՝ 'ի միում աւուր տարեալ մատուցին զհրովարտակն առ Բէիզ Իֆէնտի , եւ նախարարք երկար քննութեամբ՝ զի մի իսպառ ստոր անկցին Յոյնք՝ որպէս թէ գտեալ իցեն զմիջին ճանապարհն , գրեցին օրինակ ինչ հրովարտակի և առաքեցին առ Արքայ : Իսկ նորա տեսեալ թէ միտք նախարարաց հաստատեալ է ոչ 'ի կողմն իրաւանց՝ այլ 'ի հաճել զմիտս Յունաց , նմին իրի սրբագրեալ փոխեաց զգիրն և այնպէս դարձոյց յետս ,